



Rabu, 25 Oktober 2023
Ogen : Keluaren 2:8-10



Erbahan Cerita Si Mehuli



Ibas kecanggihan digital si gundari enda, ula min kita terjeng natap. Mbue talentanta Moria si banci ibagikan gelah kita pe senang ras terbentuk karakter mehuli, kalak pe tersampat. Konten masak-masak, beres-beres rumah, *parenting* nta pe pola asuh anak mbue kal si ngikutisa i bas youtube, facebook ras tiktok. Engkai maka la kita ikut i bas er--Berita Si Meriah arah sosial media enda. Megati ninta; la kap beluh... la iangka kami uga cara erbahanca, la kap lit cukup alatna... kerina kata-kata enda e me kata-kata kompromi si erbahanca la kita jadi pasu-pasu dengen la sahun ngaloken pasu-pasu bas Tuhan nari. *Ala bisa karena biasa.*

Miriam, turang Musa nguda denga kal paksa lit peraturen maka kerina anak dilaki si usia 2 tahun ku teruh arus ibunuh. Erdalan banna ukurna, labo lit dalam buntu, bage atena. E maka ibahanna sada scenario, gelah iselamatkan anak Firaun turangna ndai. Tupung iidah putri Firaun bayi Musa si lit i bas kotak ngikuti permaler lau Nil, alu la gentar, idahina anak Firaun ndai. Itawarkenna dirina lako ndarami nande si banci ngasuhi ras mpebelin-belin anak e. setuju putri raja e, e maka idahi Miriam nandena gelah berkat ku istana lako mpebelin-belin Musa i istana. Musa enggo jadi anggota kerajaan si tetap ipebelin nande kandungna.

Kita pe desken Miriam e nge, labo si eteh kai pe. Tapi adi lit sura-sura mehuli, dengen la kita mbiar erlajar ras gagal, maka i ja lit kininggiten i je Dibata njujuri mereken jalan keluar man banta. Si bahanlah cerita mehuli si jadi warisen i bas kita nari.